

KOLOSI Ñetü garosikao

Kolosi ñetü epovoz ñetü kapot ev. Met Esia zeisik Kolosi zei ahot Epesas zeitaz totoi demahan hehaek Pol añarab Iesuz homet hehariz hat ñetü epov menat meeh. Met porah pi Epesas, Pilipai, met Pilemon ñetü poñ amun menat paruhaz meeh.

Met Pol Kolosi zeitak nasap ok, oñ Epapras aban pop poek sat añarabon ñetiv mañooohan paru nari Iesuz homeo badae batah. Tahan aban moreg narihö emat parun ñetü moregañ mañoohaek, Epapras Roma zeitak sat ñetü pov Polin mañah. Povoz Pol ñetü hañ epov menat aban nañariv Tikikasir Onesimas manahan, parup basat Kolosi añarab manahan reköhah. Met Kolosi ñetü epovok Pol paru aban moregariz mañoohat hat navetetü, oñ Kristoz nonoroh tin sohopanez ñetiv parun bar mañah.

Met Iesu abarah sahan krismasañ 30-z zut bon tahan, Pol Roma zei ahö potak kakam zeimakeh heharah Pilipai zeitak Iesuz homet hehariz homet ñetü pov menat meeh.

Aban Pol ñetü epov menah

¹ Ne Pol, met God pimaуз hodadevok ne ba ou navatahan, Iesu Kristoz aposor abanap ravoh, met ner darim bosip ravat hezap Timoti popunañ honeo deip ev het,

² ari Kolosi añarab Kristoz homeo badea batat pim ñetiv tin bahorë hat hezaek, deim bosir sau ravat hezariz homet ñeti epov menakaz ev teg.

Met God darim Papap pimauhö ari masakao anohopanen lop tinarizarohañ hepekez ne zait toh.

Pol Kolosi poriz mañ mañah

^{3.4} Met ari Iesu Kristoz zait tat homeo badea batat het, pim añarab ravamah-modari lopori manat masak metameg-ñetiv hahan deip hatevetet orah rezah mañ mañameg-porah arimaz homet darim Amip Iesu Kristoz Papap Godin biñ mañameg.

⁵ Met Iesuz ñeti rotapuv arin añaohan hatevetet barotap bateg. Tat tokat dari pohao abarah tin hekazavoz ari biñ ravat het, Iesuz ñetivoz homet modari lopori manat masak metameg-ñetiv pov hahan deip hatevetet biñ ravat Godin, “Paru tin tamah,” pot arimaz piin mañameg.

⁶ Met God dari masakao anat Iesu meeh-ñeti pov arin añaohan, hatevetet tin hodad ravat ariti horiv hehaek betet tin ravovai samegivoz zut, paru Iesuz ñeti tin tapü epov mañovai samahan zei maposikaroh an pap manamahan, añarab modari hatevetet tin hodad ravat paruti horiv hehaek, betet petev tin tovai samah.

⁷ Met Epapras deipim bosip Iesu Kristoz gog aban tinap ravat hezan dei pimaz zait tat hez. Met deip emat arin Kristoz ñetiv añañakaz bapap tegin, pi ak garos emat ñeti tin pov arin bar añañah.

⁸ Met bar añañaekanañ pi maot ev emat Godiz Pul Tinapuhö hodadeo anamahan, ari añarab

modari lop masak metameg-ñetü pov deipin bar añaħan hateveteg.

God paru bakez batapanez mañah

⁹ Met arim pot tameg-ñetü pov bar añaħan deip hateveteg-porahanañ, dei orah rezah God ari eñizohopanez hat epat mañeо hameg, Met Godiz Pul Tinapuhö ari hodad tinao anohopanen, ari ñetü tinañihar haovai mod tairañ tovai sohopeken, pi etet biñ ravohopanez nen poñihar arim loporizaroh an pap manapanez homet piin mañ mañameg.

¹⁰ Met pot ari pim zaitivok tovai sohopeken, ziñik ul tinañ badamahavoz zut, arim tin tohopekez povor kao ahoam berevohopanen, ari pim hezhezavoz kapotaz tin hodad ravovai sohopeken pi arimaz biñ ravohopan.

¹¹ Met God pimauhö kez ahö tin hez-povonañ arim loporizaroh bakez avatohopanen ari kez tat hepeken, ariti honoñai nao ma tairao ou ravohopanez porah rekot ari nañodotü, oñ rez kek tat tin tovai biñ ravat sohopek. Met pot arimaz homet deip mañ hameg.

¹² Met darim Papapuhö añaħarab pim aliz tina-vok samaharinañ arihoneo ravat sohopeken, anohopanez hahan hez-pov bepekez hat batin haavatat eñehan hez, povoz homet ari pimaz biñ ravat, “Deim Papap tin eteñ,” pot piin mañohozei.

¹³ Met garos darim hodadeo kuturutaz zut kut tat het tovai emoogiekanañ, pi avat pimaуз ro zait tat hezapunañ honeo het sookan pi darimaz korav hepanez hat haeñehan hez.

14 Met darim horï tovai emoog-poñihö bitomez zut edemahan hegiek, ro popuhö dari ba evila-panez hat hañ horiv bat ñomahapuh darim horï poñ ba ol haveteh.

Kristoz tat hezavoz kapot ev

15 Met dari ham añarabohö rekot Godin et narez, oñ ro pim zut hez-pop erat paru Papapuz hezhez tinao ourah añaírahan dari etet hodad raveg. Met ro pop pim Papapuhö dari ma nonair nai mapotü matut etahan hez-potuz maup ravat hez.

16-17 Met tairaiz pi maup ravat hez hometunei, oñ batam nonair nai bonorah God nonair nai map matut tapanez hahan pim rop gog pov tah. Tahapuh nonair nai map abarah hezatü, ma ev hamarah hezatü, ma tairari izek het kezavonañ hez-pori, ma dari añaraboz eteamegitur, et narë hezatuz Kristo pi nenap maup ravat nonair nai mapotü tovai sohopanez hat matut tahaek taputam het tovai samah.

18 Met dari pim añarab togut ravat hezari pim herisiz zut ravat hezan, pi dari pori tinhekaz gagao ravat hez. Met ro nen pop ñomahan, darim ñomat tokat maot bal hakazat pi garosik baval hahap ok, povoz pi pop nonair nai mapotuz korav ahop ravat hez.

19 Met God pot homeh, Met nem kezavor hezhez tinao piiñ manoman map an pap manat hepan.

20 Tapanen hamarah hezari, ma revah abarah hezari, horï tohot nehanañ main ravat hezaek, pi-uhö maot nenañ honeo bavatapan. Pot homehahapuh pim rop meeñan erahan zirah ur ñomahan,

dari Godinañhoneo lop honeri ravat hekaz nonor pim ro popuhö ba ou batah.

²¹ Met batam ari Godiz ñarohol narav, oñ hori ahoñtovai emohot patari ravat heg.

²² Oñ petev arim Pap popuz nakoe sepeken ñevok evizat an etapanez porah, ariti horiv bon hepanen ari tinari hepekez hat, pim rop meeihan erat ñomat tin etah. Tat pim Papapunañ bahoneo avatahan ari pim ñarohol raveg.

²³ Met Kristo pot tah-ñetiñtin pov arin añañhan hatevetet pimaz homeo badea batat epat homeameg, Dari Godinañhoneo pohao het hek. Pot homet hez. Oñ ganö mod narihö moreg nao añañpanen hatevetet, añañpanez pov barotap batat ari Kristoz homet hezaek kaev ravat betepek hezavoz, tin homet kez tat bat hezei. Met ne Pol Iesuz ñetiñtin epovoz gogot tamohop ev, met neohö ari añañrab patarin añañvai emooohoek, ari hatevetet modarin mañoogin, paruhoe ñetiñtin pov mañoovai samahan zei maposikaroh ahö ravovai samah.

Poliz gogot toohat ñetiv

²⁴ Met ne ari Kristoz añañrab togut ravat hezariz hat kakamao hatevetehot ev hez. Met pi dari tin etapanez hat orah rezah hamarah kakam tovai emoooh-povoz zut, dari kakamao hateveteokazat hez, povoz ne amun ari pimeri eñizomaz hat gogot tovai emamohoek, paru ev kakamao netamah-poñiz homet ne kaev narav, oñ biñ ravat hez.

²⁵ Met ne ari añañrab pimaz homet togü honet ravat sameg-poriz gogot etohomaz God pimauhö ba ou navatahan hez, povoz ne pim ñetiñ nao ba iz

navatotü, oñ ari tin hodad tohopekez map añovai sohomaz nañah.

²⁶⁻²⁷ Met batam ñeti añomaz toh-epov iz ravat hehan, paru darim iz mimihol hatevetet hodad nat het tovai emoooh, oñ petev God pimauhö ba iz batahan heh-ñeti epov ba ou batahan hezaek, dari pim añarab epat hatevetet hodad raveg, Met Kristo dei Zuda añarab nenarinañ nakez, oñ ari añarab patariz loporizaroh pi amun honeo hezaek, tokat ari sat pim alizavon etet biñ ravat pinañ honeo hepek. Pot ou ravahan dari hodad ravat epat hameg, Rotap Godiz hodadeo map tinaharam hez.

²⁸ Met dei Timoti hodad tinavonañ het orah rezah Kristoz ñetiv ari añarab mapori hodad tepekez añovai sameg. Met ari hodad tinao bat Godiz nakoe sepekez porah, ari Kristonañ honeo het aban kutariz zut naketü, oñ aban hodad tinavonañariz hezat hepekez zait teg, povoz homet deip ev ari maporin añameg.

²⁹ Met ari hodad tin povonañ hepekez hat Kristo ne bakez navatat hezan, rez kek tat pim gogot kez tamohoek hori narav, oñ ne am tinam tovai samoh.

2

Dari Iesuz homet hekaz ñetiv

¹ Met ari epat hodad tepekez ne zait toh, met ari Kolosi añarab, ma Leodisia añarab, ma añarab mod tairari, ari nem taevavon et narë hezari, ne arimaz orah rezah homet mañ gogot aviam tamoh bon, oñ ne mañ gogot kez tovai samoh.

² Met ari epat tovai sohopekez ne zait tat gog kez epov tamoh, Ari lop honerë ravat het kez

tat rouvat ñaihet natotü, oñ tin het nae nap masak metovai sohopek. Met pot tohopekepuh, batam Godiz ñeti iz ravat hehao Kristo pi ñeti povoz maup erahan ou ravah-povon hatevetehot, map tin hodad tat epat hahopekez ne zait toh, “Met ñeti epov moreg bonov, oñ ñeti rotapuv ev hateveteameg.”

³ Met Kristo nenapuz loporih Godiz hodad tina-vor hezhev tin pov an pap manat hezaek, piuhö añairohopanen, dari tin hodad tohokaz nonor piiti hez.

⁴ Met tairaiz epat ev menamoh hometunei, oñ ganö mod nari ñeti moreg nao añapanen, ari hatevetet kapotaz tin hodad nataek betezam zait tat, “Ñeti tinao ev añamah,” pot hapek hezavoz ne ev menamoh.

⁵ Met rotap ne emat arinañ nakez, oñ nem loporih arimaz zakep tat homeme hezan nem homeo arinañ honeo hakez-pot ravat hez. Tat ari Kristoz homeo tin badae batat het tin togü honet ravat kez tat het sameg-pot ñetiv hahan, ne hatevetet hodad ravat arimaz biñ ravoh.

Dari Kristonañ tin hek

⁶ Met ari Iesu Kristoz homeo badae bategipuh, “Darim Amip ok,” pot hameg, povoz ari pinañ honeo het sa em tohozei.

⁷ Met aban nap zeimak demapanez hat bahahav kez bareñamahan, hamarah er horat dao hat hezan, zeimak kez tat bat hez-povoz zut Iesu pi tin hepekezavoz maup okeg, ari pi tinam kez tat bahorë hat het tohopeken, batam aban Epapras ari Kristoz homehopekez añairooh-pov arim loporizaro ahö ravat kez ravat hep. Tapanen ari

Iesuz map biñ ravat, “Ni tin etameñ,” pot piin mañovai sohopek.

⁸ Met aban mod narihö arin ñetü betez upai teptepivoz zut nao añat moreg etohopanen, ari povotü sat horiñ ravat hepek hezavoz tin homet hezei. Met aban pot añohopanez pori ñetü navokanañ navok añohopan, ma ham eparahaz hodadevonañ parum iz mimiholoz haoh-ñetü nao ok añohopan, oñ ñetü poñ Iesu Kristoz bonoñ ok.

⁹ Met arin pot añohopanez pori moregari ok, oñ Godiz kez ahovor hezhez tinao Kristo ham herisinañ hehan eteg-popuz loporih an pap manat hezaek,

¹⁰ ari pinañ honeo hezariz loporizaroh amun Godiz kez pov ahö ravat hez. Met Kristo pi nena-puhö ham eparahaz ma abarahaz kezavonañ het tamah-mod map pori ritou metat pi nenap map ahop ravat hez, povoz ari pimaz homet hezari, modariz ñetü moreg añohopanezañin hatevete-tunei.

¹¹ Met dei avatooharah deim biz kosiñ marañinañ eeloohavoz zut, Kristohö arim heri kosiñ elat zait horiñ baveteh bon, oñ pi tapupuhö arim loporizaroh zait horiñ heh-poñiz kezao ba ol havetet pim masak tinao ari haanahan hez.

¹² Met ari God Kristo baval hah-popuz kezavoz homet barotap bateg, povoz ari ivoh emeehporah Kristo ñomahapuh, zait horiñ bavon bathan pinañ honeo ravegiek, horivoz irih heg-pov bon hatah. Tahan God Kristo ñomahaekanañ maot baval hahavoz zut, ari horiñ toogiekanañ avat maot baval haakahan hez.

¹³ Met batam pi arim horiv bavon navat hehan

arim horivonañ honeo het tovai emoogiek, petev ari Kristonañ bahoneo avatahan arim loporizaroh home magei tinavonañari haravat hez. Met rotap darim hori toog-poñ map ol haveteh.

¹⁴ Met pi tair tahapuh darim hori toog-poñ ba ol beteh hometunei, oñ batam dari Godiz ñeti katë hahan hezañ elat dari hori povor kao tovai emoog-poñin pi etehan midinai ravahanahoh, Kristo zirah urah-porah pi darim hori poñ bat het baol betehaek dari hori poñiz hañiv navotü.

¹⁵ Met Kristo zirah urahan ñomahaek pi Setenir pituholor hori modari ritou metat ourah dari añarab ahovokaroz ñaravatak parum kezao bat hor batahan dari epat hameg, “Rotap paru betez ravat hezari ok.”

Ñeti betezañ barotap navatotuz ñetiv

¹⁶ Met Kristo pot tat dari eñizah, povoz ari aban modarihö moreg etapan hezavoz tin homet hezei. Met aban porihö arimaz korav ahori ravat hepanez hat ham eparaz hodadevonañ epat añamahavoz ev hamoh, “Evo, met gipizor ivov nainotuzao ok.” Ma, “Dei Zudaholoz topourat Godin biñ mañameg-aliz poñik ari amun honeo deinañ het tohozei.” Ma, “Ñonis limar tamahan deim togü manat tamegit ari tohozei.” Ma, “Deim gogot nat hez-aliz poñik ari amun tovai totunei. Met deim añameg-epen ari elepek, povoz hori ravepek.” Met pot parum ñeti añamah-epen ari tovai hatevetet baval hat totunei.

¹⁷ Met Kristo naem heh-porah pi tokat era-panez homet paru poñ tovai haemooh, oñ petev

pi haerah, povoz dari Kristoz home magei tin anahan hez-nen povoz homet het tovai sohok.

¹⁸ Met paru añamoh-pori ham heriñ nenañiz hodadevonañ epat arin añamah, “Met dei potazao ba avatahan ahoam etet Godiz tin hodad ravat hezaek, deihö ari ritou etat hez, povoz deim hodadeo bat tamegit ari amun tohopek. Tat ari enzoliholoz abatañ bat hel batat mañ mañohot arim abatañ bat hor batat, Dari betezari ev, pot homehopek. Oñ añameg-epat ari nat hepék, povoz Godiz ñarohol ravat naketü.” Met eñarohol, paru arin pot añamah-pori parumauz heriñ bat hel batat hamahari ok, povoz ari Iesuz homeo badae batameg-pov bon tapan hezavoz añamah-pov barotap batotunei, oñ, Paru ñetü betezañ ok dein añamah, pot ari homei.

¹⁹ Met paru pori Kristo darim gagao ravat hez-popunañ honeo nakez. Met darim gagañihö heriñiz korav hezan darim ururuñir kataneñ, ma nonair nai mapotü tin honeo het gogot tamah-povoz zut, Kristo darim gagao ravat hezan dari lop honerinañ ravat tin hezan, God pimaуз zaitivök hodad tinao anovai samah. Oñ paru añamoh-pori Kristo betet paru main ravat hez, povoz arin añamah-poñ tovai hatevetetunei.

²⁰ Met Kristo ñomahapuh arim horiñiz irih heg-pov bavon batahan, ari maot ham eparaz hodad horivonañ nakez, povoz tairaiz ari maot ham añaraboz añamahat hatevetet baval hat tameg?

²¹ Met ham añarab hamoh-pori moreg arin epat añamah, “God darin etet biñ ravapanez hat gipiz epat nainotü, ma pei epotü navotuz dei ahaao hagin hez, povoz ari tovai bat notunei.”

22 Met parum pot añañamah-potü nohot hekan maot zuam bon tapanezatü ok. Met potuz ahaø hamah-pori parum lop nenarizarotihanañ hodadeo bat okat añañamah, oñ Godihö hodad pov mañañamah-bonov ok, povoz hatevetet tovai baval haotunei.

23 Met paru parumauz hodadevok enzoliholoz abatañ bat hel batat arim abatañ bat hor batat hepekez añañat epat añañamah, “Met darim loporizaroz zait horiñ ahö ravapan hezavoz, darim heriñik urat kakam ahov hateveteokan poñ bon tohopan.” Pot hamahavoz ari nari hatevetet, “Rotap paru hodad tinavonañari hö ak hamah,” pot hameg batah. Oñ parum añañamah-poñ baval hat ari tovai sohopek, povoz arim zait horiñ bon natotü, oñ am ahö ravovai sohopan. Povoz parum añañamah-ñeti poñiz betezañ ok, pot ne arin ev bar añañamoh.

3

Dari Kristonañ mageiri ravat hez

1-2 Met dari horiñ tohot hegiekanañ God avat Kristonañ bahoneo avatahan, dari home mageivonañari ravat hez, povoz ev ham eparaz nonair nai potuzahar arim hodadeo manat het totunei, oñ Kristo abarah helat Godiz nakoe tek garos tinatak toutat hez-poek ari sat hezhez tinao bar batat hepekez zait tat homet het tovai sohozei.

3 Met Kristo ñomahapuh arim zait horiñinañ hegiek, kez tat horiñ poñ bavon batahan, petev ari mageiri ravat Kristo Godinañ honeo

hez-popunañ honeo het pim hezhez tinavoz ñaravatak ari hez.

⁴ Met pi arim hezhez tin okovoz maup maot emapanez porah ari amun pim aliz tinavoz lopotak pinañ honeo ravat hepek.

Dari mageiri ravathekaz ñetiv

⁵ Povoz ham eparah tamah-horï epeñ pohao betei, Biz bogï tao, modapuz añañp ma abupun etet zait tao, ma home horiv, ma modarizatz etet zait tao. Met modarizatz etet zait tepek, povoz arim loporizaroh Godiz biñ ravat samegpov bavon batovai zait horï povohar ahö ravat sohopanen, ari nen potuzahar homevai sohopek.

⁶ Met horï potuhar tovai sohot Godiz ñeti kateñir ah ñeñ elohopanez poriz pi mogao tat hañ horiv tokat metapan.

⁷ Met batam ari horivonañ hegirah añañamoh-epeñ arim loporizaroh an pap manat hehan tovai emoog.

⁸⁻⁹ Oñ petev ari nonair nai horï mod epotü amun betei, Modariz mogao tat gitait ravat ñe horiñ mañañameg-pov, ma lop horiñ homeameg-pov, ma modapuz ñeti pekü hamegiñir, ñeti moreg hamegiñ, map añañamoh-epeñ maot tovai arim gizañikanañ haotunei. Met ari batam horï toog-epeñ havetet,

¹⁰ mageiri haravat hez. Pot haravat hezan orah rezah God bamagei avatah-pop pimauhö eñizamahapuh, arim loporizaroh pimaуз zut tinari ravovai sohopekez hat am bamagei avatovai samah.

¹¹ Met batam dari main main ravat heg-pov Godihö bavon batat togü honet ba avatahan hez.

Povoz dari Zudahol, ma Grik añarab, kosiñ meelahan hezarir kosiñ nameel hez-pori, durir aerari, ma añarab aban ahori Hö zum tahan parum irih het itir as metohot hezari, ma moni gogot tamahari, dari pori toguñ main main ravat hez bon, oñ dari mapori petev togü honet ravat hezan Kristo nenap darim ahö garosikap ravat het dari maporiz ñaravatak pi hez.

Dari modari loporï manook

¹² Met God ari ba ou avatahan pim añarab tinari ravat hezan pi arimaz zait tat loporï anat eñizat hez, povoz arim abatañ bat hel batotunei, ma modari hori etohopanen ari hañ horiv metotunei, oñ ari nae nap masak metohot lop tinarizaronañ hezei.

¹³ Pot tohot paru Iesuz aviam homeo bade batat hepanez pori meñizat tin metovai sohozei. Met pot tovai sohopeken, mod narihö hori nao arih etapan, povoz ari hometunei, oñ darim Amip pi dari hori toogivoz hañiv naetotuz hahan hez-povoz zut ari amun arim modarihö hori tairañ etohopanez poñiz zuam kos rez manat tovai hañiv metotunei.

¹⁴ Pot tohot tin ari togü honet ravat hez-pov bon tapan hezavoz ari homet nae nap meñizat masak metohot hezei.

¹⁵ Met God ari bahoneo avatahan Kristo pim lop tinari ari anahan hez, povoz pim nonoroh tinam sohopekez lop tin pori anahan hezaek, arimaz korav het pim nonor añairohopanen ari orah rezah pimaz biñ ravat het tovai sohozei.

¹⁶ Tat ham añarab parum kareñ tin bizat hezavoz zut Kristoz ñeti tin hahan hezan

hateveteameg-poñ arim loporizaroh tin bizat homevai sohozei. Tat ari pim hodad tinavonañ het ganö horī nao ari tepek hezavoz, nae nap bade de mañohot hezei. Tat pim tin eñizamahavoz homet zait tat daa arim hodad hezañ, ma daa pim Pul Tinapuhö hodadeo anohopanez hezat poñ hahozei.

¹⁷ Tat nonair nai tin tohopekez potü arim main totunei, oñ darim Amip Iesunañhoneo het tovai sohot, pi dari eñizat aña irat hezan tovai same-givoz homet, God darim Papapun biñ mañohozei.

Añarabor ñarohol tohopanez ñetiñ

¹⁸ Met ari aña hol hatevetei, darim Amipuz nonoroh tinam sohopekez hat, arim abuholoz aña hopanezat hatevetet baval hat tovai sohozei.

¹⁹ Met ari abuhol amun epat hatevetei, arim aña holon kez ravat ser mañotunei, oñ parumaz zakep tat loporizaro manat meñizohozei.

²⁰ Met ari ñarohol amun tin hatevetei, arim nonor papaz map aña hopanezat tin hatevetet baval hat tovai sohopek, povoz God etet arimaz biñ ravat hepan.

²¹ Met ari nonor pap amun tin hatevetei, ganö arim ñarohol tin tovai sohopanez ñeti pov parun mañohopekezarah kaev ravapan hezavoz, tovai ari kezavonañ naiz parun mañotunei, oñ tinam masakavonañ arim ñarohol on mañohozei.

²² Met ari aña rab aban ahori Hö zum etahan het itir as metohot hezari hatevetei, met arim aban gogovoz korav hezariz aña hopanezat baval hat tohozei. Tat pori arin etehopanen aña hopanezat tohopeken, arimaz biñ ravat zait tapanez nen povozahar hometunei, oñ paru koravori mod

naek sat hepanez porah amun, Darim Amipuz irih dari ev hez, pot homet pi arin etet biñ ravohopanez arim gog tamegit tinam tohozei.

²³ Tat ari nonair nai tairatü tohopeken añarab etet zait tapanez hometunei, oñ darim Amip etet biñ ravapanez nen potuhar ari zaitivonañ het tin tovai sohozei.

²⁴ Met pot tohot epat homevai sohozei, Dei añarab ahö nen okoriz irih hez bon, oñ deim Amip Kristoz irih amun het tovai sameg. Pot homet tin tovai sohopekezavoz pi hañ tinao ari anohopan.

²⁵ Met God añarab abatavonañ ahoriz homet añarab abatao bonoriz hom namee hez bon, oñ pi tokat dari mapori ñevok evizat an etapanez porahahoh, tairari hori tohopanez pori horivoz hañiv manapan.

4

¹ Met ari aban ahori hatevetei, met arim ahop abarah het arin etet hez, povoz gog aban arim irih hez-poriz tin korav het tovai sohozei.

Mañeо hahopanez mañah

² Met ari mapori tinam hatevetei, met orah rezah ari rez kek tat het Godin mañ mañovai mod navoz honeo homevai mañ mañotunei, oñ tinam pi nenapuz homet biñ ravat, “Tin tat eñizameñ,” pot mañohozei.

³⁻⁴ Met pot mañovai dei ñeti epov menameg-eperiz amun mañ mañohopeken, God dei eñizat deim nonor ba ou batapanen, Kristoz ñeti batam izek ravat hehavoz kapot añarab modarin mañovai sohok. Met ari hodad, batam

ñetü epov mañohomaz God neen nañahan añarabon mañovai emoofovaz hat, paru ev kakam zeimakeh ne nemerizahan hez. Oñ am bar mañovai sohomaz zait tat hez, povoz God neñizohopanez hat ari nemaz am mañ hahozei.

5 Met ari añarab mod Iesuz ñetivoz kapotaz unun manat hodad nat hez-porinañ honeo hep-ekez porah ari betezam hetunei, oñ tin paru meñizat Iesuz ñetiv paru porin mañohopekez povozahar ari homevai sohozei.

6 Ma arim modarinañ hodad tinavonañ het Kristoz ñetiv mañohopeken, paru tairari hat-evetet ñetü povoz kapotaz at añohopanez porin amun ñetü hañ tinañihar mañohopek.

Ñetü meteñ ev

7-8 Met Tikikas pi darim Amipuz gogovok deinañ honeo ev het tin tamah-pop arihaz mee-man emat, nenañ honeo hezariz deim tair tameg-ñetü pov arin bar añapan. Met ñetü povon ari hatevetet deimaz biñ ravat hepekez ne zait toh, povoz pi arihaz meeman emapanez ok toh.

9 Met pinañ honeo Onesimas deim bosip ravat hezan dei pimaz zait tat hezap, batam arim zeitakanañ ev emat deinañ honeo het gogot tin tamah-pop amun meeman parup honeo ok emat, ev nonair nai deim tameg-potuz ñetiv arin bar añapan.

10-11 Met Aristakas amun nenañ ev kakam zeimakeh deip hezapur Mak pi Banabasiz napapur Zosua pim abat modao Zastas paru porihö arimaz homet, “Paru tin hep,” pot ñetiv hahaek ne ev menoh. Met Zuda aban pori Iesuz homeo badea batat het nenañ honeo ravat añarab Godiz

homeo badae batohopanez ñetü pov neñizat parun mañamah. Met Mak pi ak emapanez ñetiv ari hat haveteg, povoz pi ak emapanen ari tin metohozei.

¹² Met Epapras Iesu Kristoz gog abanap arinañ hehaekanañ ev emat hez-pop arimaz homet, “Ari tin hepek,” pot ñetiv hahaek ne ev menoh. Met pi orah rezah ari tin het Godiz añarab ravat pim zaitivok tinam tovai sohopekez hat Godin ahoam mañ mañamah.

¹³ Met rotap pi ari Kolosi añarab, ma Leodisia añarab, ma Irapolis añaraboz homet kezao ahoam mañ hamahan ne hateveteamohoek, ev añamoh.

¹⁴ Met Ruka deim dokta aban tinapur Dimas amun arimaz homet, “Paru tin hepanez dei zait teg,” pot ñetiv hahaek ne ev menoh.

¹⁵ Met añañ nap pim abatao Nimpar popuz zeimakeh Iesuz ñetiv hatevetehopanez topouramaharir Leodisia zeitak hez-arim mod pori tin hepanez homeamohoek, ari tep epee rekö hat parun epat mañei, “Pol ari tin hepekez hah.”

¹⁶ Met tep menoh-epee rekö hat Leodisia añarab manepeken paruhoe rekö hap. Met Leodisia poriz homet menat meohö-tep poe paru rekö hat arihoe anapanen rekö hazei.

¹⁷ Met darim Amipuhö Akipasin pim gog tohopanez mañah-pov rez kek tat pi am tin tovai sohot bavon batap, pot mañei.

¹⁸ Met aban mod napun ñetü epov mañohon tepaek menovai emoohaek, nemauhoe ñetü meteo ev nem marasinañ menamoh. Met ari Kolosi

añarabon epat añom, “Ari tin hepekez ne zait toh.” Met ne ev kakam zeimakeh hezaekaz ari nemaz amun unun manotunei, oñ nemaz homet mañ hahozei.

Met Godiz masakao arinañ hepanez ne zait toh.
(Pol ñetiv hahan menahat nen ev.)

**Baiñetinavoz Tep Tokatit
The New Testament in the Kunimaipa Language of
Papua New Guinea
Nupela Testamen long tokples Kunimaipa long
Niugini**

copyright © 1989, 2002 Wycliffe Bible Translators, Inc.

Language: Kunimaipa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-26

PDF generated using Haiola and XeLaTeX on 28 Dec 2024 from source files dated 31 Aug 2023

d39747ff-5d8e-5f3a-b70c-bc47d226623d